

Nakorsat namminersortut nakorsiartarfimmik ingerlatsinissaminnut inatsisitigut allatigullu aporfigisinnaasartagaannik Naalackersuisut UKA2019-mut misissueqqullugit peqquneqarnissaannik Inatsisartut aalajangiiffigisassaattut siunnersuut. Misissuinermilu siunnersuutigineqassaaq aporfiusinnaasut qanoq aaqqinneqarsinnaanersut

(Inatsisartunut ilaasortaq Siverth K. Heilmann, Atassut)

Akissuteqaat

(Peqqissutsimut, Isumaginninnermut Inatsisinillu Atuutsitsinnermut Naalackersuisoq)

Siullermeerneqarnera

Naalackersuisut Inatsisartunut ilaasortaq Siverth K. Heilmann, Atassut, nakorsat namminersortut nakorsiartarfimmik ingerlatsinissaminnut inatsisitigut allatigullu aporfigisinnaasartagaannik misissuinnessamut periarfissat pillugu aalajangiiffigisassatut siunnersuummik saqummiussineranut qutsavigaa.

Naalackersuisuni siunnersuuteqartoq isumaqatigaarput nakorsanik kiisalu peqqinnissaqarfimmi sulisunik amigaateqarneq akiorniarlugu periarfissanik misissuinnessaq pingaaruteqartoq. Peqqinnissaqarfik maannakkuugallartoq suliassaqarfimmi arlalinnik suliniuteqarpoq. 2018-imi ukiakkut peqqinnissaqarfitsinni sulisussanik amerlanerusunik kajungilersitsisussanik atorfinitsitsiniartartunik nutaanik pilersitsisoqarpoq. Ukkatarisassat aamma ilagaat Kalaallit Nunaanni Danmarkimilu ilinniartut ilinniakkaminnillu naammassinneqqammertut siusissukkut pitsaasumillu attaveqarfigineqarnissaat. Suliniut tamanna pingaaruteqarpoq misilittakkat ajoraluartumik takutimmassuk nakorsanngorniat naammassisut affaasa missaannaat Kalaallit Nunaannut angerlartatut.

Nakorsat namminersorlutik nakorsiartarfimmik aallartitserusuppata atuisullu akileerusuppata nakorsat namminersorlutik nakorsiartarfiuteqarnissamut periarfissaqarput. Tamanna immaqa siunissami nakorsanik aal akkaasumik atorfeqartitsinissamut qulakkeerinneqataasinnaavoq. Aalajangiiffigisassatut siunnersutip tunngavilersuutaani eqqaaneqartut ullumikkut Nuummi kigutilerisunik namminersortunik ataasiakkaanik peqareerpoq. Taamatuttaaq nakorsaq nakorsiartarfimmik ammaanissaminut periarfissaqarpoq. Maannakkuugallartoq nakorsat nakorsiartarfimmik namminersortumik pilersitsinissaannut inatsisitigut aporfiusinnaasunik peqanngilaq. Pisuni taama ittuni Nunatta Nakorsaaneqarfiata suliassarissavaa nakorsap namminersortup, peqqinnissaqarfiup avataani peqqissaanermik suliffeqarfiuteqartup, nakkutiginnissaa.

Naatsorsuutigineqassaaq nakorsaq laboratoriami misissugassanik laboratoriamut innersuussisinnaassasoq. Tamatumunnga aamma atuuppoq ilassutitut misissuinerit, soorlu tarrarsuinerit aamma ultralydimik misissuinerit kiisalu nakorsaatnik tunniussinerit. Taamaasilluni nakorsiartarfimmik namminersortumik pilersitsinissamut piumasaqaataassaaq

pisortat peqqinnissaqarfiannik suleqateqarnissaq. Naalakkersuisut ammaffigisinnaavaat peqqinnissaqarfiup assersuutigalugu nakorsanik namminersorlutik nakorsiartarfiutilinnik suleqateqarnissamut periarfissaqarnissaa.

Taamaattumik Naalakkersuisut nalilinngilaat suliassaqarfimmi misissuinissaq pisariaqartoq, tassani pissutsit pingaarutillit erseqqereermata.

Taama oqaaseqarlunga siunnersuut itigartitsissutigineqassasoq Naalakkersuisut inassutigaat.